

Staðfesting forsetans á skipulagsskrá fyrir styrktarsjóð til rannsókna á stjörnulíffræði, útgefin á venjulegan hátt að mandatum, af dómsmálaráðherra 22. nóvember 1983. Skipulagsskráin er þannig:

SKIPULAGSSKRÁ

fyrir styrktarsjóð til rannsókna á stjörnulíffræði.

1. gr.

Sjóðurinn er stofnaður að frumkvæði Félags áhugamanna um stjörnulíffræði.

2. gr.

Stofnfé er framlag frá Félagi áhugamanna um stjörnulíffræði, að fjárhæð kr. 100.000,00 — eittundraðþúsund — krónur.

3. gr.

Ennfremur leggur Félag áhugamanna um stjörnulíffræði sjóðnum til allan tekjuafgang, sem verða kann af rekstri félagsins næstu 10 árin frá stofnun sjóðsins. Þau framlög skulu afhendast sjóðnum árlega strax eftir að reikningar félagsins fyrir næst liðið ár hafa hlotið samþykki á aðalfundi félagsins.

4. gr.

Þá tekur sjóðurinn við gjöfum, áheitum og öðrum framlögum, sem honum kunna að berast.

5. gr.

Stofnfé sjóðsins samkvæmt 2. grein má aldrei skerða.

6. gr.

Tilgangurinn með stofnun sjóðsins er að skapa starfsskilyrði til rannsókna á stjörnulíffræði m.a. með því að afla fjár til þess að eignast húsnæði fyrir starfseminna.

7. gr.

Sjóðurinn er undir sérstakri stjórn 5 manna, kosinna af stjórn Félags áhugamanna um stjörnulíffræði. Fyrsta stjórn sjóðsins skal kosin til fimm ára, en að liðnum fullum fimm árum frá kosningu þeirrar stjórnar skal einn stjórnandi ganga úr stjórninni eftir stafrófsröð og kosning fara fram á einum stjórnarmanni á ný.

Þannig gengur einn stjórnandi úr stjórn árlega, þar til öll stjórnin hefur verið endurnýjuð, og hefst þá ný endurnýjun með því að fyrst gengur úr stjórn sá sem fyrst tók þar sæti samkvæmt fyrstu endurnýjun og síðan hver af öðrum þannig að kosinn er einn stjórnarmaður árlega. Endurkjósa má stjórnendur svo oft sem vera vill. Á aðalfundi félagsins skal einnig kjósa tvo endurskoðendur fyrir sjóðinn til eins ár í senn, og skal annar þeirra a. m. k. vera löggiltur endurskoðandi. Stjórn sjóðsins skiptir með sér verkum.

8. gr.

Reikningsár sjóðsins er almanaksárið.

9. gr.

Stjórn sjóðsins heldur aðalfund árlega á tímabilinu 15. janúar til 15. febrúar, og skal hann boðaður með ábyrgðarbréfi eða á annan sannanlegan hátt með 7 daga fyrirvara.

Á aðalfundi skal gefa skýrslu um hag sjóðsins og rekstur. Leggja fram endurskoðaða reikninga sjóðsins og skýra frá breytingum á stjórn sjóðsins, ef um þær er að ræða, og öðru sem við kemur stjórn hans og rekstri. Verkaskipting hjá sjóðstjórninni skal ákveðin á aðalfundi.

10. gr.

Leita skal staðfestingar forseta Íslands á skipulagsskrá þessari og breytingum, sem á henni kunna að vera gerðar.

11. gr.

Breytingar á skipulagsskrá þessari taka ekki gildi fyrir en þær hafa verið staðfestar samkvæmt 10. gr.

Staðfesting forsetans á skipulagsskrá fyrir Verðlaunasjóð dr. phil. Ólafs Daníelssonar og Sigurðar Guðmundssonar, arkitekts, útgefin á venjulegan hátt að mandatum, af dómsmálaráðherra 28. nóvember 1983.

Skipulagsskráin er þannig:

SKIPULAGSSKRÁ

fyrir Verðlaunasjóð dr. phil. Ólafs Daníelssonar og
Sigurðar Guðmundssonar arkitekts.

1. gr.

Sjóðurinn heitir „Verðlaunasjóður dr. phil. Ólafs Daníelssonar og Sigurðar Guðmundssonar arkitekts“ og er stofnaður árið 1954 af Svanhildi Ólafsdóttur Daníelssonar, konu Sigurðar Guðmundssonar arkitekts.

2. gr.

Stofnfé sjóðsins er hálf húseignin Hagamelur 21 í Reykjavík (með þeim kvöðum, sem á eigninni hvíla), enn ágóða af eigninni skal verja samkvæmt tilgangi sjóðsins, sbr. 3. gr. a—c. Verði húseignin seld, telst andvirðið til stofnfjár og skal ávaxtast með sem tryggilegustum hætti.

3. gr.

Tilgangur sjóðsins er:

- a) Að verðlauna íslenskan stærðfræðing, stjórnufræðing eða eðlisfræðing. Skal verðlaununum úthlutað án umsókna og í fyrsta sinn 31. okt. 1955, á 78 ára afmæli dr. phil. Ólafs Daníelssonar, tuttugu þúsund kr. Heita verðlaunin „Verðlaun Ólafs Daníelssonar“. Þeim má ekki skipta. Úthlutun fer fram þriðja hvert ár, í annað hvort skipti samkvæmt 3. gr. a, en í annað hvort skipti samkvæmt 3. gr. b. Úthlutunarupphæðirnar a og b eru ætíð jafnar innbyrðis. Úthlutun 1955 kallast 1. úthlutun a, en 1958 1. úthlutun b, 1961 2. úthlutun a o. s. frv.
- b) Að verðlauna teikningar íslenskra arkitekta að nytsömum byggingum í landinu eða skipulagningu innanbæjar í Reykjavík, að undangenginni samkeppni. Heita verðlaunin „Verðlaun Sigurðar Guðmundssonar“. Stofnandi sjóðsins áskilur sér og manni sínum, meðan annars hvors þeirra nýtur við, rétt til að ákveða verkefni það, sem um ræðir í hvert sinn, en eftir þeirra dag Húsameistarafélagi Íslands. Auglýst skal um samkeppnina hálfu ári fyrir úthlutun. Leita skal tillagna dómnefndar, er Húsameistarafélag Íslands skipar samkvæmt reglugerðum félagsins um samkeppni.
- c) Eftir fyrstu úthlutun og síðan (þ. e. í fyrsta sinn árið 1961) má veita aukaverðlaun úr sjóðnum, er samtals nemi helmingi aðalverðlauna. Við úthlutun a. skal styrkja stúdent úr stærðfræðideild Menntaskólans í Reykjavík, en við úthlutun b. skal styrk úr sjóðnum varið til verndunar þjóðminja og leita tillagna þjóðminjavarðar.